

四庫全書

集部

欽定四庫全書

梁谿集卷四十九

宋 李綱 撰

表劄奏議十一

乞罷宣撫使劄子

第二劄子

乞罷宣撫使表

第三劄子

第四劄子

第五劄子

第六劄子

第七劄子

再乞罷宣撫使表

第八劄子

第九劄子

辭免除觀文殿學士知揚州劄子

乞覈實宣撫司見在軍兵財物劄子

乞罷宣撫使劄子

七月二十五日解潛折彥質出兵南北關與賊相遇力戰

而退上劄子待罪乞罷職任

臣近具奏狀劄子以解潛折彥質南北關進兵將士退卻乞賜黜責未奉指揮伏念臣昨蒙聖恩差充河北河

東路宣撫使自以智術淺短不足以仰副委任之重累
具辭免不蒙俞允迫於天威黽勉就職自受命以來思
自罄竭以圖報效而軍旅之事素非所習節制不明方
略無取致解潛等與賊遇於南北關力戰累日勢力不
加尋即退卻曾無尺寸之效責在大帥咎將誰歸夙夜
憂懼心氣怔忡動輒遺忘豈可復總軍政伏望聖慈矜
憐檢會臣待罪章疏特降睿旨罷臣知樞密院事及河
北河東路宣撫使遴選重任代臣職任就近令范世雄

管構許臣交割迤邐前去聽候指揮

第二劄子

臣伏蒙聖慈以臣乞罷職任特降親筆令安心職事及蒙宣諭和議解圍兩不相妨若金人必欲三鎮不免戰爭今則解圍之事不可少緩臣伏讀聖訓第深恐懼竊以今春賊馬犯闕倉卒無備自當議和但一切如其所欲許以三鎮及金幣之數太多則為非是臣所以當時與宰執力爭者正恐貽今日之患非為不欲和而主戰

也賊馬旣退河北兩鎮幸自保全而太原之圍至今未
解陛下旣出師以解圍又遣使以約和議雖兩不相妨
然敵情狡獪自春徂秋頓兵堅城之下而不退又以重
兵侵犯河朔我師屢北而議和之使始行臣恐中國之
勢益弱而黠敵之氣益驕矣且自秋以來沿邊探金人
日聚兵為南牧深入之計朝廷日罷兵如太平無事之
時今中山河間真定諸郡乞兵告急羽書狎至宣撫司
無兵可遣申奏朝廷又只行下宣撫司措置是徒以空

文往復初無補於實用敵騎猖獗復有今春之虞將何以禦之臣屢具劄子乞再行起發後來罷止防秋人兵團結弓手之類未蒙施行伏望留神為宗社計募兵擇將以圖自強無謂和議之使便可恃以為安也如臣書生不習兵法不歷行陣大帥之任誠非所宜況今春危城之中陛下之所驅策者悉已去位而臣獨以非才尚叨重寄恐不知者謂臣黷武貪功為國生事招致人言陛下雖欲保全不可得也仰冀聖慈終始哀憐特降睿

旨許臣守本官致仕糜捐之報期於異日冒干天威不勝戰越待罪之至

乞罷宣撫使表

臣某言伏蒙聖慈以臣累具劄子乞罷知樞密院事河北河東路宣撫使守本官致仕或外任宮觀一次特降詔書不允者王事方棘願徇國而捐軀將略弗優敢籲天而請罪與其冒寵榮而誤國曷若乞骸骨而避賢優詔弗俞燦細書之一札孤蹤增厲惕危腸之九回再瀝

愚衷仰干睿聽

中謝

伏念臣斗筭小器章句陋儒粗聞

忠義之風不知軍旅之事分栖遑於巖壑敢希冀於功名屬國步之多艱躡貴游而並進荐膺聖獎超執事機俾待罪於西樞復宣威於北部自惟謏薄必至顛隳既懇避之莫從卒懷憂而就遣經營庶務黽勉百為鬚髮為之蒼浪氣血從而凋喪法嚴令具雖明馭衆之方將情卒驕尚襲近年之弊并門之圍未解保塞之寇鼎來致此猖狂職臣庸懦雖屢祈於罷黜終未賜於允俞伏

望皇帝陛下覆以堯仁察之舜智念臣才謀淺短不足
有為憐臣疾病連延誠非避事冀垂寬宥特賜保全盡
解兵權俾歸田畝江湖在望庶自畢於餘生溝壑未填
或收功於晚節

第三劄子

臣所乞罷職任非緣避事及為身謀實以不習軍旅之
事不可為帥自知甚明恐誤國事及今改命尚可設計
以解太原之圍以禦河北之寇仰副聖意更少稽緩決

致疎虞雖賜斧鉞之誅亦復何補伏望睿慈特賜矜察

第四劄子

臣累具劄子乞罷知樞密院事河北河東路宣撫使守本官致仕伏奉宸翰令安心職事未賜俞允伏念臣猥以庸庸誤膺委寄力小任重福過災生疾病交攻心慮憤亂寢食俱廢生氣索然儻或貪冒寵榮尚總軍政必誤國事自取顛隳伏望聖慈察臣忱誠非有沽激特降睿旨許依所乞使獲退休則終始保全雖天地父母之

恩何以加此餘齡未泯誓極糜捐干冒天威無任惶懼
激切之至

第五劄子

臣累具劄子仰干天聽以不材而當重寄恐誤國事乞
賜斥罷許令致仕別選能臣躋躋俟命未蒙俞允第深
惶懼臣聞量材授職不强以所不能者君之道也陳力
就列而不能則止者臣之節也如臣書生不習金革之
事受命之日固嘗力辭迫於天威黽勉就職夙夜自竭

思效鉛刀一割之用而進無尺寸之功乃知素非所習
不可勉強儻或貪冒恩榮而忘不能則止之義豈惟有
誤國事且將得罪於古聖人臣所以不避斧鉞之誅再
三冒瀆期於得請仰冀聖聰有以照察之也臣又聞壯
火之氣衰少火之氣壯臣自今春以來更歷憂患志氣
凋落正如傷弓之鳥望曲木而先驚責其勇敢復如曩
時雖自激昂豈可復得方陛下欲張皇六師盪攘羣醜
之秋必得心果氣銳謀猷方壯之人奉命徂征乃克有

濟伏望聖慈察臣惓惓之誠非愛死非謀身正恐更或敗事上累陛下知人之明誤國大計雖伏鈇鑕亦復何補特賜矜憐許以骸骨歸於田里則天下之人皆知陛下以臣嘗效犬馬之力曲賜保全誰不知勸非獨臣區區之私幸也干冒天威無任戰越待罪之至

第六劄子

臣累具劄表干冒天聰乞罷職任守本官致仕或外任宮觀一次伏蒙聖慈特降親筆許臣候种師道到交割

職事赴闕議事仰荷天恩終始保全但深感泣近准尚書省劄子折彥質除宣撫判官及備奉聖旨令臣不得輕易進兵伏念臣智謀無取疾病交攻比日以來夙夜震恐心氣不寧動輒憤亂豈敢復為進兵之計但邊事緊急須人措置而臣束手坐視無可為者深恐誤國伏乞降旨促師道起發或且令折彥質前來交割臣得扶疾迺邈前去聽候指揮不勝惶懼激切之至

第七劄子

臣累具表劄奏狀仰干天聽乞罷知樞密院事河北河
東路宣撫使守本官致仕或外任宮觀一次伏蒙聖慈
再降詔答未賜俞允重念臣學術荒疎智能譎薄誤被
使令過其分量雖自罄竭曾無尺寸之效夙夜愧懼憂
悸成疾不能支持伏望矜憐特降睿旨許依所乞異時
圖報當極糜捐干冒天威無任惶懼戰越之至

再乞罷宣撫使表

臣某言伏蒙聖慈以臣累具劄子乞罷知樞密院事河

北河東路宣撫使守本官致仕或外任宮觀一次再降
詔書不允者危誠上達方虞斧鉞之誅溫詔俯頒未遂
丘園之請敢再陳其懇悃庶仰冀於矜從

中謝

伏念臣

一介書生不習兵事忘身徇國雖堅衛上之心制勝運
籌初乏折衝之略誤蒙天獎俾長樞庭出分閫外之權
未迪師中之吉雖聖恩寬大必將赦三北而用孟明然
公議沸騰豈肯以一戰而恕房琯與其招人言而得罪
曷若控君父而乞身往城于方宜有赫赫之南仲在泮

獻馘必資矯矯之虎臣自度非才請避賢路伏望皇帝
陛下容之以天地之量燭之以日月之明憐臣勞瘁而
無補於事功察臣精誠而有志於忠義進以道而退以
禮不使翱翔保其始而全其終勿令隕越則臣誓堅素
守仰戴鴻恩失東隅而收桑榆捐軀未晚先朝露而填
溝壑結草為期

第八劄子

臣伏蒙聖慈特降宸翰矜憐孤蹤過有存撫初言睿斷

所以用臣總戎之故中言諸將難以倚仗遂致不敢輕易進兵之由終言臣昨在圍城之中嘗效犬馬之勞欲力賜保全之意聖恩隆厚雖父母之於子不過如此感激涕零不能自止伏念臣學非適用材不逮人徒抱愚忠常欲奮不顧身以徇國家之急誤蒙委任俾之宣撫兩路而臣自知材力譾薄誠不足以仰副重寄力具辭免天意莫回黽勉就職亦欲少效涓埃之報而事與願違略無所補以寬陛下北顧之憂此臣所以夙夜震恐

慙歎憤懣至於寢食俱廢疾病交攻累瀝危誠以乞骸
骨仰冀矜從雖被竄誅所不敢辭也伏蒙陛下聖訓丁
寧既照察其精誠又憫念其勞瘁許以保全不使隕越
顧臣何人遭遇如此粉骨碎身曷足圖報伏望聖慈檢
會臣累上表劄奏狀特降睿旨從其所乞許令罷知樞
密事河北河東路宣撫使守本官致仕或外任宮觀一
次上以昭陛下保全臣子之大德下以全微臣知止之
節非獨臣之幸也實天下之幸也臣見迺邇前去封丘

縣以來聽候指揮干冒宸嚴無任惶懼俟罪之至

第九劄子

臣伏奉親筆累數百言訓勅丁寧以終始保全之意宸章奎畫燦如日星臣伏讀感涕不能自止已具劄子稱謝及乞檢會臣累上劄表奏狀特降睿旨許令罷職任守本官致仕或外任宮觀一次未奉俞允螻蟻之誠敢再叙陳仰干天聽伏念臣疎拙愚直初無他長方道君朝仕不過史官以言事遠謫流落七年誤蒙召還遭遇

陛下龍飛之際不待左右之言首蒙賜對臣未及敷奏
之間聖語褒諭以臣昨論水事章疏曾經御覽記錄姓
名遂被親擢躡處從班未旬日間金人犯闕臣非時請
對與宰執廷爭有合天意遂蒙擢與大政方擾攘中日
被委使中遭詆誣罷斥累日聖恩隆厚勞問不輟尋復
舊任自春以來孤危之蹤任用保全獲至今日皆出天
造而臣材力綿薄初無毫髮之補濫膺兩路宣撫之寄
雖受命未久然不能率勵將士驅逐醜類以寬陛下宵

旰食夜衣之憂中夜以思有覲面目今蒙恩召赴闕議
事咫尺天威雖不勝臣子戀慕之誠然復何顏以望清
光兼臣屢經憂患夙夜震恐疾病交攻心氣不寧難以
勉強任事所以不避斧鉞之誅控告君父乞賜罷黜投
閒養疾不敢貪戀寵榮妨塞賢路誠非獲已伏望聖慈
容以天地之度照以日月之明聽臣危懇哀而憐之特
降睿旨從其所乞則陛下非獨有保全臣子之言乃有
保全臣子之實蒙被驅策者孰不感勵兼臣犬馬之齒

未衰使得就閒養疾心氣稍安復蒙任使捐軀未晚干
冒天威無任祈懇激切戰越待罪之至

辭免除觀文殿學士知揚州劄子

九月初交割宣撫司職事

與折彥質還次封丘被受尚書省劄子
除觀文殿學士知揚州具劄子辭免

臣准尚書省劄子備奉聖旨除臣觀文殿學士知揚州
天恩隆厚未賜誅責復加寵榮感戴之極涕泗橫流伏
念臣偶以孱庸叨備器使有罪無功不足以當祕殿之
隆名心勦形瘵不足以任淮海之重寄倘或冒處必致

人言已具狀奏聞乞追還成命外伏望聖慈檢會臣累上章疏特降睿旨依臣所乞守本官致仕或外任宮觀一次則始終保全悉歸天造臣以備受指揮免見謝辭不候受告般家接人取便道疾速發赴新任密邇闕廷不獲瞻望清光豈勝犬馬戀慕之情雖在山林不敢少忘陛下天地父母之德惟當旦旦焚修仰祝睿算

乞覈實宣撫司見在軍兵財物劄子

靖康元年八月末被

旨赴闕議事九月初行次封丘蒙恩除觀文殿學士知揚州上劄子具宣撫司見管軍兵

財物數目奏聞乞
差官前去覈實

臣伏蒙聖慈以臣累具表劄乞罷知樞密院事河北河
東路宣撫使特除臣觀文殿學士知揚州軍州事兼淮
南東路兵馬鈐轄臣已具奏辭免恩命乞守本官致仕
或外任宮觀訖念臣仰荷聖知特加委任所以力丐罷
者非愛身怯敵之故特以疾病及節制不專議論不一
進退牽制事有不可為者難以虛受其責臣自六月二
十七日總師出國門七月二十日次懷州八月二十一

日被受尚書省劄子召赴闕議事任宣撫司職事并在道塗首尾五十餘日初宣撫司蒙朝廷差到步兵二萬分為左右前後中軍軍四千人臨啟行日得旨差左軍統制官曲竒將本軍往北河招撫勝捷叛兵差右軍統制官黃璘將本軍往真定府宣撫副使劉韜下使喚臣所將帶前後中軍凡萬二千人見在懷州屯駐隨時訓練并陝西路節次發到保甲一萬三千餘人見分威勝軍隆德府澤州汾州衛州等處防守范世雄帶到荆湖

北路將兵峒丁刀弩手等五千餘人見發往隆德府屯
駐前項兵並未曾使用初宣撫司蒙朝廷應副錢二千
萬貫又御前降到見錢鈔二十萬貫銀絹各十萬匹兩
除支官兵食錢并十日一犒設用過數目不多外餘皆
椿留懷州及在京降賜庫尚有在內藏庫未曾支出者
三分之二具有文歷簿籍掌管官吏可考按也臣旣罷
去恐不知者謂臣喪師費財惟陛下遣使覈實雖臣自
以不才丐罷願朝廷益擇將帥撫馭士卒與之捍敵金

人狡獪謀慮不淺和議未可專恃一失士卒心無與禦
侮則天下之勢去矣臣自此不復與國論敢冒死以聞

梁谿集卷四十九

欽定四庫全書

梁谿集卷五十

宋 李綱 撰

表劄奏議十一

親征行營司劄
子御筆批荅附

奏知防守酸棗門并乞分遣執政官分巡四壁守

禦劄子

奏知酸棗門守禦捍退賊馬劄子

奏知再遣王師古等兵會合何灌兵出戰劄子

乞給賞將士劄子

奏知已遣王師古出援張搆勾收召募人馬劄子

奏知造橋利害劄子

奏知种師道等兵馬劄子

乞种師道聽節制劄子

奏知城上守樂器具有未備處劄子

乞措置防護汴河斗門及引水入濠劄子

乞内外兵馬並聽節制劄子

親筆宣諭城外軍馬聽宣撫司節制

乞中軍人馬於殿前班教場教閱劄子

奏知放入何灌人馬許孝烈等駐泊去處劄子

奏知捉到活人等押赴种師道劄子

奏知定廂禁軍食錢劄子

奏知所統五軍分隸無復移易劄子

奏知感寒在假服藥劄子

乞用暖轎至閤門劄子

親筆宣諭策應姚平仲三首

乞免策應姚平仲劄子

乞仲師道同出策應劄子

乞應副長入祇候人馬劄子

親筆宣諭不得交兵

罷尚書右丞待罪劄子

奏知防守酸棗門并乞分遣執政官分巡四壁

守禦劄子

臣適來已到新酸棗門躬率將士防守探得北賊已約
三四百人過城壕內作過今已號令城上見嚴備守禦
外即時劄付何灌張撝引兩頭項人馬前來掩殺合具
奏知仍乞分遣執政官分巡守禦

御筆

執政上城恐防行遣號令已差蔡懋提舉自可巡城
分官守禦

奏知酸棗門守禦捍退賊馬劄子

臣見在酸棗門城上同盧端措置守禦及催督張撓何
灌王師古等接戰賊兵退屈勢必萬全不煩聖慮所乞
差宰執分守壁壘慮驚東擊西事體不細臣切望留
神所有劉延慶西壁闕人已差人應副去訖謹具奏
知

御筆

公忠略之志朕記於心更切詢問曾經邊塞人悉心
體國分布防守存恤撫勞若賊兵退遁異等獎擢

奏知再遣王師古等兵會合何灌兵出戰劄子
臣探得張撟人馬已到陳橋門外轉城淹殺賊兵其先
在酸棗門下作過番賊漸已過壕潰散臣再遣王師古
王何等兵自萬勝門出會合何灌兵同共掩殺謹具奏
知

御筆

訪聞何灌已身死未知兵馬差甚人統領已批付三
省密院疾速照會施行如王師古王何可差即便差

充

乞給賞將士劄子

臣見在酸棗門分守京城北壁賊兵漸退將士多重傷
乞賜降下銀碗綵絹給賞并於南北酒庫等處支酒付
軍前使用謹具奏知

御筆

酒已支四百瓶銀碗共二百隻量功支賞公更悉心
捍禦朕皆知之李綱傳御筆內藏庫支綵絹無支絹

一千足

奏知已遣王師古出援張撟勾引召募人馬劄

子

臣奉聖旨分兵出援張撟等軍馬今來已遣王師古外
全闕人兵契勘李彌大已充參謀所有提舉前後中軍
召募到人馬已有器甲除已一面勾取赴本司外合具
奏知伏乞更賜處分施行

御筆

依奏

奏知造橋利害劄子

臣見同蔡懋監視造橋已差人兵防護臣愚竊謂橋成賊馬寅夜或有衝突恐非力所能制深屬不便渡棧雖稍避極為得策更望聖慈詳酌施行

御筆

若不作橋金國愈疑可用枋或板作橋日晚權時徹去庶得稍便如可施行奏來

多用甲兵强弩斬馬刀李綱日逐專在彼措置照管
或弔橋甚善

奏知种師道等兵馬劄子

臣適得种師道奏狀四封謹遣投進詢來人云師道所
統兵馬約二萬餘人大半係騎兵皆有器甲士皆勇銳
雖師道令歇亦皆不肯星夜前來繼有陳開姚平仲及
他頭項兵共約十萬餘人臣已將差到人犒設及發文
字與師道傳諭聖意訖合具奏知

御筆

可問道催天下兵不可不密言語文字亦不可不慎
恐為金人所獲更令种師道勾集陝西未來者將官
人馬

乞种師道聽節制劄子

臣契勘种師道所統西兵將至闕下兵家以節制為重
節制不立雖以李光弼郭子儀為帥亦有相州之潰今
來种師道所統兵到日欲乞特降睿旨聽臣節制庶幾

不至誤事

御筆

种師道宿將善於兵職位甚高難受卿節制作同官
替曹矜可也曹矜戚里豈識兵事奏來付李綱

奏知城上守禦器具有未備處劄子

臣今日依稟聖旨在新鄭門應副姚平仲下人馬器甲
急逐在軍已請器甲津般到新鄭門約計八十餘副據
姚平仲稱得旨巡視西北城壁回至新鄭門已日晚乞

來早交割臣已委官在門下管押訖并據姚平仲稱東
西水門須用排杈木以防賊馬及城上守禦器具北之
邊城有未備處臣已逐一劄下京城所依應施行去訖
合具奏知

御筆

卿竭力徇國朕甚嘉之中心不忘金人多詐姦謀不
淺切在審詳行之

乞措置防護汴河斗門及引水入壕劄子

臣伏奉御批送到劄子為壕河水勢陡落見有人涉水
過往寅夜不便令多差人守禦臣已劄下四壁疾速依
應施行契勘汴河水洄今已累日慮被賊人開決斗門
欲遣將兵防護汴河堤岸司官吏前去相度收斗門水
并南有蔡河西有金明池水櫃金水河皆可引水入壕
增助水勢欲乞指揮都大提舉汴河堤岸司同共相度
疾速措置施行謹具奏知

御筆

依奏同陳良弼評議如可以施行即疾速措置

乞內外兵馬并聽節制劄子

臣昨日申時聞馬忠承樞密院指揮移塞入壕披城屯泊事屬非便臣即時劄下馬忠依舊於元劄塞處不得移動今准內降御批依舊令劄塞施行訖奏來急速不得時刻注滯臣已再行下馬忠遵依聖旨施行去訖契勘臣屢奉聖旨專令掌兵馬事應係內外統制兵馬并令聽臣節制軍政方一欲乞降睿旨付三省樞密院今

後有指揮應干兵馬事并先關送行營使司相度施行
庶幾不敢誤事謹錄奏聞取進止

御筆

城內兵馬聽李綱節制城外兵馬別差人

親筆宣諭城外兵馬聽宣撫司節制

應城外軍馬統制統領官已下並聽宣撫司節制不
得侵紊付李綱知委奏

乞中軍人馬於殿前班教場教閱劄子

臣契勘中軍統制人馬見在殿前司駐泊緣殿前司窄狹難以教閱欲乞時暫權於殿前班教場內教閱一日犒設訖依舊於殿前司駐泊伏望特降指揮取進止

御筆

依奏

奏知放入何灌人馬許孝烈等駐泊去處劄子臣早來已具奏知何灌人馬暴露日久欲乞來日相度開門放入臣已差下統制官王師古交割統領其許孝

烈郭淵臣即不知御前已差兼不知本人見今駐泊去處更指揮元承受官司催促施行謹具奏聞

御筆

一面審詳施行

奏知將捉到活人等押赴种師道劄子

臣伏奉御批令臣將捉到活人及走還漢人押赴种師道訖奏臣已依稟聖旨將夜來李構押到走還漢人趙寅押赴种師道處外合具奏知

御筆

更押數人前去

奏知定廂禁軍食錢劄子

臣伏奉御批措置廂禁軍米事臣契勘城守糧食最為大事見在米粟有限運漕未通支俵數目太多又有食錢實為僥冒臣欲乞禁軍并支二升半廂軍二升其食錢諸處申請數目不等見行勘會亦乞措置務均一謹具奏知如合聖意乞降付臣施行

御筆

恐減之生事卿更熟思施行

奏知所統五軍分隸無復移易劄子

臣伏奉御批令臣措置兵事整齟軍馬臣竊仰陛下威
斷神武出於天縱戡定大難定克有成而臣猥以常材
方艱難中謬當重任敢不率勵將士以死報國仰答恩
遇臣所統左右前後中軍分隸已定乞降處分無復移
易謹具奏知

御筆

更不移准此

奏知感寒在假服藥劄子

臣今月三十日早朝退忽感寒氣發熱頭昏見今服藥
欲望聖慈許免來日早朝取進止

御筆

莫要醫官否將息早出參時方多事全賴執政可否
相濟當體此意

乞用暖轎至閣門劄子

臣伏奉御批撫問令臣將息早出參者臣仰戴聖恩不勝感涕重念臣自軍興以來夙夜盡瘁靡遑食息衝冒風寒見今在行營司用本司醫官看治臣曉夕稍可支梧欲望聖慈特許臣用暖轎至閣門外不以時入對取進止

御筆

依奏

親筆宣諭三首

宣諭只今策應姚平仲

李綱只今前去策應姚平仲
不管少有違滯

宣諭押人出門策應

仰李綱只今押人出門策應

宣諭姚平仲已出兵

姚平仲已出兵仰李綱疾速盡數發人馬前去策應
隨宜措置如敢違滯當行軍令

乞免策應姚平仲劄子

臣伏奉御筆令將帶本司人馬出城策應姚平仲臣契
勘近者福寧殿議用兵事期以二月六日且候姚古种
師中到今來姚平仲舉事臣不預知諸軍人馬整齷未
畢兼臣見以感寒發熱在假就行營司將理委是難以
前去伏望聖慈特降睿旨免臣策應取進止

御筆

李綱須管火急前去策應取軍令狀奏

乞种師道同出城策應劄子

臣伏奉御批令臣策應姚平仲臣敢不力疾仰報陛下
委遇之意緣陝西諸路及四方勤王之師并係受种師
道節制乞降聖旨令种師道與臣同出城庶幾緩急之
際可以策應謹具奏知臣相度本司人馬當出城北占
據形勢一則策應姚平仲二則護衛都城臣已指揮勾
集中軍左右人馬赴封丘門聽候使喚欲乞降付新舊
封丘門鎖匙

御筆

种師道自別一項係前鋒出戰難以同共卿等只作
後軍策應可疾速施行不得輕動與諸將審而決之
大功只在今夕來早矣首尾卿贊而成天人必助之
乞應付長入祇候人馬劄子

臣已到封丘門伺候左右中軍人馬齊足出城近壕差
到長入祇候四十八人並未有馬欲乞降旨於本班中
選擇應副謹具奏知細紙甲乞降付十副

御筆

一面於合屬處作聖旨取急速

親筆宣諭不得交兵

李綱等見統制兵馬為有計議使人在此未可交兵
應城外諸處兵馬依此不得交兵李綱切依此不可
少有違誤大事

罷尚書右丞待罪

右臣今月初三日准東上閣門關報三省樞密院同奉

聖旨罷臣尚書右丞行營使交割與蔡懋臣已即時罷
任交割訖見今在浴室院待罪臣不勝惶懼戰越之至
謹具奏聞

御筆

不須待罪安慮

梁谿集卷五十

欽定四庫全書

梁谿集卷五十一

宋 李綱 撰

表劄奏議十三

守禦使司劄子
御筆批答附

乞黜責梁方平許佃劄子

乞差孟揆幹當舟船劄子

奏知范瑒下軍馬前去懷澤州防托劄子

繳進根刷到遞角劄子

奏知四路出兵控扼河津劄子

乞立定支破諸色人食錢劄子

奏知支錢放散城上保甲劄子

乞於殿前衙置宣撫司劄子

奏知收到梁方平獨脚旗劄子

奏知募到使臣侯章去大金軍中見肅王劄子

進呈撫諭河北及獎諭徐處仁詔劄子

奏請畫一劄子

奏知种師中在太原府南石橋下寨劄子

奏知种師中見在榆次縣下寨劄子

卷尾

奏知种師中已到真定應援太原劄子

乞嚴止絕諸軍浮言扇惑劄子

乞委三衙揀禁軍劄子

發遣快行親從官待罪劄子

奏知喻意吳敏劄子

乞賜武漢英等器甲袍帶劄子

卷尾

奏知發夏國詔書劄子

奏知姚古節制不明乞差解潛抵替劄子

乞罷守禦使司劄子 第二劄子

第三劄子

乞黜責梁方平許佃劄子

臣見已安撫宣德門外軍民各令歸家照管老幼仍號令不得打傷內臣出榜告示如違當行處斬已各退散欲往西北城上照顧守禦比聞梁方平許佃自臣罷後依舊上城守禦不合軍民之心欲乞將兩人黜責以為

將士之戒不然乞陛下即降指揮各令罷去別擇人管理取進止

御筆

依奏黜責與保命卿且為朕慰安人心

乞差孟揆幹當舟船劄子

臣契勘將來控扼河津合通南北道勾集舟船事務不少欲乞差孟揆充軍前構當舟船事務貴得辦集合具奏知取進止

御筆

依奏付綱

奏知范瓊下軍馬前去懷澤州防托劄子

臣適得孟揆劄子稱范瓊下軍馬於二十二日晚到滑州下寨為橋船落水過渡未得臣與吳敏等商量欲劄下范瓊令過河前去懷州澤州防托良便更合取自聖裁謹具奏知

御筆

依奏

繳進根刷到遞角劄子

臣契勘昨自金人作過以來道路不通四方奏報委積
郵傳臣尋委差本司屬官張奕同馬忠措置新鄭門以
西遞鋪今根刷到遞角六百餘件除係進奏院收管外
有金字牌子肆箇已開奏狀五十紙并實封奏狀二十
封用黃帊封全謹具進納

御筆

備見卿勤勞益加歎獎

奏知四路出兵控扼河津劄子

臣伏奉聖訓薛安等不可都統制緣係宣撫司日前差委今來金人已行三日若候姚古种師中恐緩不及事臣與三省樞密院參議於今月十三日四路出兵控扼河津如金人渡河即會合護送至河間中山府界今具兵將人數下項

一馬忠往濬滑州控扼河津

統西兵四千九百九十一人

統東兵一萬九千五百三十三人

一郝懷往河陽控扼河津

統西兵五千八人

統東兵三千一百五十四人

一韓世忠往大名府控扼河津

統西兵四千一百二十一人

統東兵三千七百一十六人

一林良器往陽武原武控扼河津

統西兵四千七百二十四人

右謹具奏知取進止

御筆

今四路出兵都統制不才恐誤國大事須候姚古今
先令薛安去後差姚古臨陣易將不便切候姚古等
知奏

乞立定支破諸色人食錢劄子

臣准御寶批送婁全等叫道流星馬請不得口食錢米
事伏奉聖訓速與施行臣已劄下四壁應有似此之人
立便支給外契勘京城逐壁日前支破諸色人食錢多
寡有無並不立定則例皆是臨時各自申請所以不均
臣見令取會欲乞候取到數目本司量度中制立為定
例庶幾均一取進止

御筆

依奏

奏知支錢放散城上保甲劄子

臣契勘城上保甲暴露日久元係畿縣差到其家類遭
兵劫理宜先行放散臣已劄下逐壁令人支錢一貫文
放散去訖所有團結到城裏居民臣已指揮並令放散
惟守城正兵須俟大軍控扼河津都城解嚴方合卸甲
放散歸營合具奏知

御筆

甚好所有錢並須均齊切當誠所掌人

乞於殿前衙置宣撫司劄子

臣伏奉御寶批令臣差人押宗室士璣赴太宗正司庭訓訖除名鎖閉又令臣差統制官日下將兵於京城內巡邏彈壓臣已恭依聖旨差人管押士璣赴太宗正司交割及令左右中軍統制官分認地界差將佐人兵巡邏彈壓去訖又奉御批今將大晟府舊行營使司置宣撫使司令种師道在彼鎮服衆情仍先出文牒令百姓通知惟此一事未敢施行蓋行營雖罷已改作守禦使

司臣每遇早朝退依舊在彼治事所有本司人吏官屬
並在彼安泊文籍錢物銀絹器甲等並在彼置庫安頓
若置宣撫使司則百事又皆紊亂勞擾竊慮陛下所降
今來指揮未相照應謹却繳進如欲種師道在近鎮歷
乞降指揮於殿前衙置宣撫司可也更望聖慈詳酌施
行謹錄奏知

御筆

依所奏施行訪聞百姓見今尚有殺內侍官者仰速

差人禁止

奏知收到梁方平獨脚旗劄子

臣今晚途中逢快行家捉到兩人稱傳呼兵士解甲及將青黃獨脚旗儀與地分尋詢問兩人稱係北壁提舉守禦官李構下使臣傳指揮廂軍不得帶甲下城如遇下城並令解甲其獨脚旗不肯承認已劄問李構外已將兩人解送開封府并據告事人稱梁方平將皂獨脚旗鍬鑕等分散在逐地分臣已差使臣分頭根究收取

未到及據問勅來見臣稱北壁傳指揮收了守城人鎗
刀器械見李構稱是曾指揮交收了及修內司兵士稱
奉修內司姓吳人指揮令去壕外築牆高六尺如此則
金人可以藏身矢石皆不可及逐項事節皆係緊切伏
乞聖慈詳酌施行謹具奏知

見收到獨脚旗九面除兩面留此照驗外七面今繳進
所有北壁器仗已劄下依舊俵散去訖再具奏知

御筆

一面令改正

奏知募到使臣侯章去大金軍中見肅王劄子

臣近召募到使臣侯章前去大金軍中見肅王并駙馬
曹晟體問消息今據侯章回來稱到磁州滏陽野寨中
見肅王并曹晟並各安樂未有回期取到肅王曹晟親
書付本家文字今繳進謹具奏知

御筆

大金軍馬次第如何只今奏來

進呈撫諭河北及獎諭徐處仁詔劄子

臣恭稟聖訓擬草定撫諭河北州郡及獎諭徐處仁詔書二道進呈如可施行乞用御寶下以憑發遣北京差來人事屬緊切合具奏知進止

御筆

詔甚奇若人去時切防虜掠恐金人得知不便卿微疾想漸平愈更宜加慎

奏請畫一劄子

臣今具合奏事件下項

一勝捷兵昨日得旨差孫渥張師正統領前去訪問
孫渥官雖高不曾經歷行陣武略大夫王從道西
人善用兵飽經戰鬪欲令同張師正統領仍乞來
日引對賜以器甲戰袍令日下發遣

御筆

依奏

一陝西轉運使張灝以其父孝純令赴闕奏事已到

國門乞降旨閤令不隔班先次上殿訖迴任

御筆

兩日前已指揮閤門訖

一京畿地八將已差赴种師道下使喚所有孟彥宏
押到西兵保甲二千餘人卻撥與錢蓋將帶往陝
西使喚

御筆

依奏

右謹具奏知

奏知种師中在太原府南石橋下寨劄子

臣伏奉宸翰种師中在甚處差人探問及起京西一將
赴宣撫司使喚臣契勘適見劉韜奏狀稱據中軍將趙
哲申師中軍馬探望得在太原府南石橋下寨去太原
十八里已差效用兩人前去探問外所有京西將兵見
契勘差撥次其劉韜奏狀繳進謹具奏知

御筆

若是如此可令劉韜急發人救應并應副糧草前去
不移刻行

奏知种師中已到真定應援太原劄子

臣適得劉韜諮目報种師中已於二十二日到真定由
井陘路應援太原并擒到生口處審問得金人輜重十
六七間已離太原粘罕二十一二間亦此去韜欲遣人
前去收復忻代所有諮目同繳進謹具奏知

御筆

覽來奏少解憂心皆祖宗積德所致羣公同心之力
可更措置早令出界今秋甚近大要枝梧糧食人馬
城池塘濬一一急速施行

乞嚴止絕諸軍浮言扇惑劄子

臣伏奉聖訓諸軍亂傳散賞前事如何可以消弭臣契
勘諸軍只緣上皇扈從人兵給賞過優推恩過厚所以
鼓倡浮言今將已緝捕在殿前司開封府人杖配懲戒
靜以鎮之自須無事或出一勅榜開諭軍人以上皇暴

露日久扈從之人理宜優異乃以崇奉上皇之故至於在京諸軍非有功者不賞事體不同今後輒敢撰造語言遞相扇惑者並從軍法如此處置似為穩便更乞聖裁謹具奏知

御筆

依奏

乞委三衙揀禁軍劄子

臣伏蒙聖訓欲於輦官教駿清衛廂軍內揀禁軍臣竊

思之於事甚便但專委三衙自可以辦如別置揀兵所則三衙必又有語更望聖裁

御筆

依奏如已揀充禁軍慮或逃避當嚴立法發遣

快行親從官待罪劄子

臣前月二十八日奉御批守禦使司快行親從官十二日發遣歸本司臣即時依稟聖旨發遣歸本司訖適聞前項親從官並已得罪臣契勘累嘗具奏乞罷守禦使

司未蒙俞允故前項人亦因循未曾發遣歸司今來逐人別無罪犯若以因循有失發遣罪乃在臣伏乞聖慈特賜黜責臣無任皇懼待罪之至取進止

御筆

無得罪之理已降旨皇城司令依舊祇應卿但安慮此乃皇城司官誤曉今早批旨深所愛卿始終保全但審思之罷司更俟畧經思慮付出施行

奏知喻意吳敏劄子

臣伏蒙聖慈令臣喻意吳敏不得再有陳請吳敏適間
宣押到都堂不曾相見已即上馬作簡與之亦未曾答
容臣再以簡具道聖意續奏聞次

御筆

如此不知卿曉其意否不知為甚圖作紛紛

奏知發夏國詔書劄子

臣伏奉宸翰付到夏國詔即差使臣齎發前去合行事
容臣來早同宰執面奏次謹具奏知

御筆

來早奏恐遲先具奏

奏知姚古節制不明乞差解潛抵替劄子

臣伏奉宸翰太原未解圍日夕憂念寢食皆忘仰見聖慈留神邊事焦勞如此臣等措置無效不勝皇懼待罪之至適得种師中奏統制諸將已至太安驛去太原府九十里節次斬獲金人首級開通道路得張孝純蠟書張師正軍馬已到中山行軍有法決須成功欲乞先次

降詔獎諭及撫問將士量加犒設其姚古節制不明致汾州統制官等軍馬潰散乞差解潛抵替其解潛已到長安已催令星夜發來赴闕奏事訖前去亦須多降金帛令軍前激賞訪聞汾州見有官絹十餘萬匹河東民戶以金人虜掠見無衣著而有窖藏以絹易粟可以足食所有种師中等奏狀三紙繳進乞賜聖裁

御筆

种師中奏昨日並皆子細看了封出除已降詔獎諭

師中外並令三省密院行下量加犒賞其餘解潛等
事依奏作聖旨施行

乞罷守禦使司劄子

臣累具劄子乞罷守禦使司未蒙俞允竊緣使司今來
別無職事而有官吏食錢之費在今日財用窘乏之際
誠為可惜臣愚以謂不若遂行罷去將所餘銀絹錢物
等並歸元來去處官告送納御前如聖意未欲遂罷即
乞別差官提舉及將臣所辟置官屬見存數員並行減

罷取進止

第二劄子

臣契勘昨具劄子乞罷守禦使司伏被聖旨令候金人出境結局今來河北敵軍已退太原解圍祇在朝夕所有守禦使司別無職事欲乞限五日結絕所有見在錢物銀絹官告等乞並送左藏庫樁管聽候樞密院緩急支用其簿歷等並送比部驅磨一宗公案付樞密院收管取進止

第三劄子

臣今早嘗具劄子乞罷守禦使司未蒙降出施行竊緣敵人遠去京邑底寧守禦之司實為虛設伏望聖慈特賜俞允臣早來所上劄子欲將本司所餘錢帛官告等送左藏庫寄納准備樞密院緩急使用今來相度亦不須如此乞盡撥歸元來去處官告送納御前或行毀抹見今庫官攢造供具已支見在數目續具進呈取進止

御筆

可併歸樞密院其錢帛官告等本處收聽候緩急取
旨支用

乞賜武漢英等器甲袍帶劄子

臣伏奉聖訓令武漢英張思正來日日下出門已劄付
逐人知委欲乞早賜器甲袍帶以激勸之謹具奏

御筆

已差陳顧言賜訖

乞催教車戰使臣教頭劄子

臣伏奉宸翰李石處戰車數等可取索定驗堪使者令
造臣近已曾取索到數等內姚古者似可用昨已造五
百兩近再指揮湊造一千兩已於姚古處勾能陣戰使
臣教頭十人前來教習尚未到謹具奏知

御筆

可催督施行

奏知种師中見在榆次縣下寨劄子

臣伏奉聖訓速要見种師中見在甚處臣適見河北運

使張益謙奏體探得師中見在榆次縣下寨臣已召募
效用與借進義校尉前去榆次縣師中處投下文字候
取得回文日取旨推恩補正所有張益謙奏狀繳進謹
具奏知

梁谿集卷五十一

欽定四庫全書

梁谿集卷五十二

宋李綱撰

表劄奏議十四

河北河東路宣撫使司
劄子一御筆批答附

乞使副差武臣一員劄子

論兵食等事劄子

乞免簽書密院常程文字劄子

乞括馬劄子

乞差曲竒充統制官劄子

再乞曲竒劄子

乞置承受官劄子

乞令承受官王褒隨軍劄子

乞辟劉珣充統制官劄子

乞令李邈權帥真定劄子

再乞免簽書密院常程文字劄子

繳進秦元圖冊及奏知解潛議事劄子

奏知看詳秦元圖冊并乞差察視親事官劄子

乞支降見錢劄子

乞治逃避士卒劄子

奏知應副解潛等銀劄子

奏知賞罰董有林冀景等劄子

乞令張灝同折可求節制汾晉人馬劄子

再乞令張灝同折可求節制劄子

乞招捕勝捷軍劄子 乞差种師道巡邊劄子

乞立收復忻代賞格劄子

乞殿前馬軍司摘馬劄子

乞使副差武臣一員劄子

臣伏蒙聖訓已除臣宣撫使李彌大為副臣與彌大實
皆書生初不深曉兵事恐誤國計使副當以武臣一員
有名望者為之臣非敢惜身避事實懼仰辜委任之意
更望聖裁謹具奏知

御筆

若與師道俱行亦無害但恐老不肯治事卿參酌衆
議只今奏有名望者武臣一員來急速

論兵食等事劄子

臣伏奉御筆卿素忠義何故不欲去者臣旣已受命豈敢不行實緣朝廷之事議論不一或以為臣所請之物難辦或謂師道不當罷或謂臣不當行紛紛如此何以集事臣竊謂陛下所以遣臣者欲責以事功也若兵寡則何以分援兩路而振國威若物少則何以供給將卒而作士氣況兩使並行於事體自是未當非臣不欲行也伏望聖慈特賜睿察更容來日面稟聖訓謹具奏知

御筆

卿去時切不可輕舉接戰除此祝卿其餘定保萬全
必不貽朕念寬北顧之憂矣 物與兵二事朕當悉
力應副三省之議未定適已親筆出知早來喻卿者
意卿但撫綏將士慎重措置

乞免簽書密院常程文字劄子

臣伏奉聖旨未起離間依舊於樞密院治事臣契勘見
今宣撫司事務煩多精力不給欲乞除樞密院應于邊
防調發兵馬差除兵將官使臣外其餘常程文字特免

簽書取進止

御筆

依舊簽書

乞括馬劄子

臣契勘軍行全藉騎兵今來宣撫司出師得馬不滿千
疋又多羸弱金人鐵騎動以萬數將來防秋不知何以
禦之今早嘗具面奏乞於都城括馬以濟目前之用伏
蒙俞允敢望聖慈令三省日下措置先降指揮非品官

不許乘馬續令開封府根括立定格尺價例官為收買其低小不堪披帶者不在此限盡數撥赴宣撫司給散闕馬諸軍庶幾軍容稍振不為虛文可收實用取進止

御筆

李綱乞括民馬可詳酌施行付中書急速行下

乞差曲奇充統制官劄子

臣契勘曲奇今日已到闕伏望聖慈差充本司統制官填劉錫改差闕取進止

御筆

旗鼓等並依奏行下曲奇欲差作御帶不知卿可輟
否別踏逐人亦須有之適彥質奏來河東事並有次
第須卿早去受命已月餘尚遷延如此有損國體兼
河北河東人民日望宣撫到卿可促日前去馬等事
已指揮尚書省速令應副訖

再乞曲奇劄子

臣伏奉聖訓以臣辟置曲奇為統制官令別作路逐者

契勘种師中姚古軍潰散之後仰荷天慈委以宣撫重
寄主憂臣辱不敢辭難旋擇將佐無一可用者非得一
二統制官稍有名望何以服衆前乞劉錫不旋踵已除
制置使今幸曲竒到闕若干冒聖聽辟置軍中使護
諸將則此行未見有可委仗者伏望睿慈特從所乞不
勝幸甚取進止

御筆

邊臣可委豈無但未踏逐到耳莫且尋如果無別奏

李邦彥已令責

乞置承受官劄子

臣契勘宣撫司各置承受官一員伏望聖慈於近上內
侍中選差取進止

御筆

差睿思殿祇候王褒

乞令承受官王褒隨軍劄子

臣伏蒙聖慈遣宣撫司承受王褒前來議事將來軍行

欲乞令王褒隨軍前去更合取自聖裁拈馬尚未蒙朝廷施行日限已逼乞降睿旨催促謹具奏知

御筆

王褒隨軍可依所奏劄與本人拈馬文字只今再錄卿所論劄子一本來待看詳催督

乞辟劉垺充統制官劄子

臣契勘中山府路鈐轄劉垺已到闕其人材武有謀臣欲辟充宣撫司統制官伏望聖慈特賜召對問以方略

臣前薦文林郎郭制中雖已得旨賜對久未有班次乞
下閣門令來奏引對取進止

御筆

依奏施行

乞令李邈權帥真定劄子

臣曾具劄子乞令李邈權帥真定蓋恐錢伯言到遲有
妨劉韜出入李邈權帥真定亦可倚以辦事伏望聖慈
早賜降旨施行取進止

御筆

已批付三省訖只今更催

已批出三四日為甚至劉
今未行卿可問三省官

駘奏甚善卿一面措畫施行

再乞免簽書常程文字劄子

臣近具劄子乞免樞密院簽書常程文字伏奉御批依
舊簽書臣契勘見今宣撫司措置事務委是繁多日力
不給伏望聖慈許臣除應于邊防調發兵馬差除兵將
官使臣外免簽書仍不依時上馬赴宣撫司治事取止

止

御筆

依奏

繳進秦元圖冊及奏知解潛議事劄子

臣伏奉內批取秦元所進三冊二圖謹依稟繳進適已
召解潛議事欲且保隆德府觀事勢前去威勝進兵來
早對訖出門謹具奏知

御筆

解潛事依奏卿可將秦元所進三冊二圖令三省密院同看如可用即降陣圖付秦元教保甲三冊令諸軍保甲為永久法疾速施行

奏知看詳秦元圖并乞差察視親事官劄子

臣伏奉御批令將秦元所進圖冊付三省密院同看詳施行臣已依稟訖所有將來出師合差察視親事官隨軍使喚乞降旨皇城司依前後體例差撥取進止

御筆

兩劄並已行下三省并馬軍司及王宗濬訖親事官
令差去赴宣撫司卿可疾速治行為朕了此大事必
有厚報太原圍閉久每念之無不流涕也

乞支降見錢劄子

臣伏蒙聖慈令三省支降錢十萬貫文京西轉運使司
糴買糧草應付宣撫使司准尚書省劄子令於新稅錢
內支撥竊緣新稅錢見於民間理索今來出師在近理
須預辦糧草深慮闕誤伏望聖慈令自朝廷支降見錢

或於內藏庫借支將來却令樁還庶幾日下可以集事
取進止

御筆

朕應副卿令內庫借支日後令朝廷撥還畫旨行下
係一十萬貫

乞治逃避士卒劄子

臣契勘方此暑月出師士卒已有棄下器甲逃避者若
不嚴行止絕切慮遞相倣效深屬不便臣已令諸軍檢

察如見得姓名即具奏聞乞下開封府及本營緝捕從軍法施行先具奏知

御筆

當如此朕已親筆下開封府如緝得宣撫司逃避軍人差人押送赴卿施行

奏知應副解潛等銀劄子

臣伏奉宸翰令臣將本司銀錢應副河東支用臣契勘已將銀二萬兩應副解潛見錢鈔十萬貫應副錢歸善

五萬貫應副折可求一萬貫應副高衛外今再起發銀
二萬兩應副錢歸善一萬兩應副張灝共計應副過銀
五萬兩錢一十六萬貫並差使臣管押前去候取收附
到日繳進次謹具奏知

御筆

已令快行齎關子與河東轉運銀絹折錢金令內臣
蔣堯卿押付折可求銀絹令李倫赴河東轉運司銀
絹令秦同老押赴卿各有數不能具寫俟到卿一一

差點檢取會數奏來如更闕少亦具奏

奏知賞罰董有林冀景等劄子

臣契勘諸道約日會合進兵之初須令賞罰分明足以
勸沮竊見武節郎董有林權知隆德府數月脩葺城池
招復逃散人戶極有風績武節郎楊志昨隨种師中先
次收復榆次縣大兵旣潰志不免退師諸將散逸志獨
收集殘兵保據平定屢次立功殺退敵馬理須激賞臣
已便宜作奉聖旨董有林與閣職楊志與免合降官更

轉一官訖冀景昨於石嶺關失守近又於文水縣潰散
王用昨統守禦司人兵中路潰散近又於文水縣敗却
理須重罰臣已便宜作奉聖旨冀景王何各削奪在身
官職令白身充統制候立到奇功與甄叙訖謹具奏知

御筆

甚善極當理所有轉官人關與三省出給官告

乞令張灝同折可求節制汾晉人馬劄子

臣伏奉宸翰張灝欲依舊節制將士解圍太原令臣熟

思合如何施行奏來臣契勘折彥質奏解潛以節制不
一十羊九牧無所適從故罷灝節制今來灝所團結召
募將士民兵等亦五百餘人欲往汾州會合折可求身
自督戰兼汾州一帶有松子嶺之類可以出奇皆灝平
時措置去處欲乞許灝同折可求節制汾晉人馬會合
解圍更望聖裁取進止

御筆

依奏

再乞令張灝折可求節制劄子

臣伏蒙聖慈差使臣押到太原府下蠟書人并宣示張孝純蠟書臣敢不迎尊睿旨約束將帥會合解圍以上副焦勞之意近具劄子乞令張灝同折可求節制令措置西山一帶伏望早降睿旨庶使不失機會取進止

御筆

依奏卿一面畫旨行下

乞招捕勝捷軍劄子

臣訪聞勝捷軍兵勢頗猖獗若不早行掩捕招收漸向
東南為患不細臣已作奉聖旨令宣撫司出榜招諭令
人齎榜付曲竒韓世忠及行下逐路提刑司去訖所有
榜文今同繳進謹具奏知

御筆

足見憂國愛君之心嘉歎不忘

乞差种師道巡邊劄子

臣累具劄子乞依舊起發諸路防秋人兵及乞令种師

道統帥前去中山照應繫國大事皆未得報伏望陛下
深留聖念取進止

御筆

种師道已降勅差帶樞密巡邊

為別無名故
以巡邊為名

乞立收復忻代賞格劄子

臣契勘解圍太原不次推恩已有親筆手詔外收復忻
代未曾明立賞格忻代不復則太原亦難安居臣欲乞
將立到奇功收復忻代將士與依解圍太原推賞庶幾

有所激勸其王以寧乞前去措置劄子今同繳知

御筆

依此降旨曉諭將士

乞殿前馬軍司摘馬劄子

臣伏奉宸翰令促解潛前去河東交割職事已行下令
限日下出門去訖臣見今治行但所得馬軍三千人內
二千七十餘人關馬殿前馬軍司不肯應副雖蒙指揮
樞密院措置應副緣太僕寺等處見今關馬無可支撥

伏望聖慈降旨殿前軍馬司摘那有馬人兵抵替須管足庶幾軍容稍振實係國體取進止

御筆

足則恐難足得可令摘馬一半應副係見殿前馬軍司見管數摘那一半大率見在一千足摘五百足赴宣撫司作奉聖旨施行

梁谿集卷五十二

欽定四庫全書

集部

梁谿集卷五十三至五十八

詳校官庶吉士張溥

侍讀臣孫球覆勘

總校官知縣臣楊懋珩

校對官中書臣潘奕雋

謄錄監生臣陳山琨

欽定四庫全書

梁谿集卷五十三

宋李綱撰

表劉奏議十五

河北河東路宣撫使司
劉子二御筆批答附

繳進劉韜申狀劄子

奏知約束解潛等會合劄子

繳進通信林牙書詞劄子

論郭仲荀劄子

奏知行遣親事官劄子

乞脩復塘梁舊制劄子

乞令張慤專一應副糧草劄子

發回親事官劄子

奏知賈瓊等功狀劄子

乞在外宮觀劄子

奏知大臣擬進文字劄子

繳進太原賊寨圖劄子

乞遣使劄子

再請宮觀劄子

奏知督責張灝劄子

親筆宣諭節制事

宣諭施行節制事

宣諭再劄下節制事

奏乞起發弓弩手劄子

乞致仕宮觀劄子

繳進劉幹申狀劄子

臣得劉幹申狀錄到太原府張孝純蠟書係劉幹遣人
於鳩尾送書入城孝純方知朝廷遣幹并解潛措置河
東解圍事係今月初一日臣契勘太原圍閉已踰半年
軍民堅守無有二心今諸將約期會合有可成功之理
此誠宗社之休而陛下聖德所致更望少寬聖慮所有

劉韜申狀同繳進謹具奏知

御筆

覽茲奏涕下沾衣卿忠義徇國奮不顧身太原解圍
專在卿力不可出此月恐敵情愈生姦計朕日望捷
音更與督諸將

奏知約束解潛等會合劄子

臣得劉韜咨目與解潛張灝等議定二十八日進兵會
合解圍臣元約二十五日以前以潛灝稱威勝軍汾州

兩路軍馬器甲錢糧未備故展三日不出此月使事稍
辦集亦所不爭臣已催趲元降付河東器甲及截撥陝
西器甲過懷州界度如期可以至軍前又以本司銀絹
見錢關子劉次應副已再行約束解潛張灝折可求令
如期會合前去所有劉韜諮目及臣約束今同繳進謹
具奏知

御筆

卿切指揮諸將牙相照應敢有觀望不進者卿便行

軍法仍令諸將知如立功便除節鉞更有奇功當加
開府儀同三司將士兵卒兩倍推恩若止逼逐出界
亦奇功也歸師勿遏卿更詳之解潛似不用心卿更
誠之并可求卿所奏並依奏付三省密院訖

繳進通信林牙書詞劄子

臣所遣歸朝官通信林牙書詞錄白繳進謹具奏知

御筆

通信林牙書甚善快行四人并李倫秦同老押錢銀

絹係三項今日已起發盡絕數日想可到更俟童貫
物來當發金二萬兩付河北河東卿不須慮朕不應
副朕凡事節儉收拾金銀錢絹止欲實賞戰事保守
祖宗疆土

論郭仲荀劄子

臣伏見知雄州郭仲荀罷不知何故仲荀沈鷺有謀諳
練兵事武臣中所難得守雄州極為有功今既罷任未
有差遣臣契勘太原府見關總管見今王稟祗是權在

城中將來解圍須要得力兵官幹辦軍馬伏望聖慈優與仲荀遷官特除太原府路都總管令隨宣撫使司候太原解圍日發赴新任取進止

御筆

已與仲荀轉一官差隨宣撫司聽候任使如到卿一面作聖旨差注

奏知行遣親事官劄子

臣契勘昨承御前差到察視親事官二十人分在五軍

察視今月二十二日有中軍察視親事官閔義一名飲酒至醉將把門兵士劉興超打據監門使臣周全等呵驗委實有酒具狀申舉臣尋送推司根問招伏情犯臣以係御前差到之人具所犯送皇城司施行謹具奏知

御筆

一面處斬軍中不可不肅卻待更差十人親事官去與卿使喚今來有過委卿一面斷遣

乞修復塘灤舊制劄子

臣契勘塘灤深不可舟淺不可涉限隔戎馬實為國家
永遠之利緣塘灤有蒲魚稻田自來係屯田司勾管以
修治隄防為名其實以充私用往往放洩塘水營利自
豐漸令塘灤湮廢不足限隔深失祖宗之意今來新開
塘灤皆係民田伏望聖慈特降睿旨下河北路轉運司
相度會計一歲所脩隄防之費量自轉運司及朝廷應
副不許種植稻田其蒲魚之利許小民採取庶幾塘灤
漸復舊制而沿邊貧民蒙被陛下德澤實為大惠取進

止

御筆

依奏卿一面作奉聖旨行下訖奏

乞令張慤專一應副糧草劄子

臣昨已得旨令張慤張益謙應副本司糧草除張益謙已往劉韜軍前外張慤近准尚書省劄子令往中山府置司糴買本司關漕臣應副竊恐誤事兼糴買自來只合委官不須置司伏望聖慈特降睿旨令張慤專一應

副本司糧草其中山府糴買令委官前去施行取進止

御筆

依奏卿一面作奉聖旨行下

發回親事官劄子

臣伏蒙聖慈再差到察視親事官十人臣契勘本司左右軍已差往河北前後軍已差往河東見今中軍已有先差到親事官使之察視今來所差到十人別無使喚去處臣已令快行家依舊管押赴皇城司外謹具奏知

御筆

甚善

奏知賈瓊等功狀劄子

臣據劉韜王瓌狀申賈瓊楊志於壽陽縣界節次攻擊
戎馬及殺獲近上首領趕墮崖谷死者甚衆兼捉到活
人稱敵衆中說今次南朝人馬硬不似日前必是將銀
買來雖小捷未足道然大兵會合斷進亦足以為先聲
除賈瓊已取到立功人功狀奏聞外楊志功狀見取會

保明謹具奏知

御筆

甚可喜皆卿措置所致賈瓊楊志疾速保明功狀當
優與推恩朕削減濫賞專以官爵賞軍功戰士

乞在外宮觀劄子

臣輒瀝誠懇仰干天聽臣素有少腸氣疾近因冒暑發
作痛楚牽拽腰腹兩日來頓覺行步艱難見力疾治事
深恐有妨軍政誤國大計今來諸路大兵會合並已進

兵太原圍解祇在朝夕伏望聖慈察臣非避事者特降
睿旨許令候太原解圍之後次第將本司職事交割與
劉幹除臣一在外宮觀使得就閒養疾異時驅策誓極
糜捐干冒天威無任皇懼戰越之至取進止

御筆

卿奮然忠義迺社稷之臣朕方賴卿如長城豈得有
此請今封還來奏

奏知施行大臣擬進文字劄子

御筆

大臣奏軍前事付去看詳可否施行付李綱

臣伏奉宸翰宣示大臣擬進文字四件臣看詳皆可施行已逐一行下諸路將帥去訖契勘大兵進發會合今已三日仰遵睿算冀克有成但臣責任之重夙夜震懼不皇寧處纔候軍前有報即上聞次謹具奏知

御筆

卿想勞神朕自二十八日至今夜卧不安席惟俟嘉

音

繳進太原敵寨圖劄子

臣昨遣郭執中隨解潛軍至北關令照管控扼將士具到劄子并畫到太原敵圖一本同繳進謹具奏知

御筆

執中老成素知兵遣去甚善今日童貫金已到河北河東差內侍陳珣楊公謹管押逐路轉運司各一萬兩卿軍前三千兩竊恐轉運無心力卿可與措置庶

共濟國事朕應副兩路行遣寢食未嘗忘願早復祖
宗疆土

乞遣使劄子

臣近蒙聖訓遣使金國今適其時乞降睿旨令速發遣
庶幾不失機會取進止

再請宮觀劄子

臣伏蒙聖慈以臣具劄子自陳因冒暑宿疾發動乞候
太原解圍就緒日除一外任宮觀特降親筆不允仰戴

天恩伏深感泣竊念臣迂邁無取誤蒙陛下特達之知
付以重寄不敢辭難今者大兵進發指期破敵保全舊
疆臣敢不力疾自效但於仰遵睿算破敵解圍之後乞
賜矜憐從臣所請則終始大德異時圖報當誓捐軀干
冒天威無任皇懼戰越之至取進止

御筆

卿副朕委寄竭身徇國破敵解圍之後當與卿共保
太平之休勿復有請

奏知督責張灝劄子

臣伏奉宸翰宣示張灝奏狀令臣措置施行臣契勘灝昨緣罷節制不肯與事致汾州等處軍馬久失整覈既蒙聖恩復還節制自合星夜詣汾州治兵上以報國下以救援父兄久在圍城之患乃以催督糧運為辭久留平陽府及稱得折可求報汾州有戎馬出沒且在回牛嶺照應顯是推托逗遛不進臣已作奉聖旨劄下折可求須管收復樓煩縣及劄下李宗應副錢糧般運晉降

斛斛不管闕誤外一面推督張灝趕趁大軍責以不忠不孝之罪將來解圍太原如灝輩實不可驅使乞候解圍後便罷灝察訪使謹具奏知

御筆

張灝如此顯見誤事卿自可一面施行

親筆宣諭節制事

御筆

節制不一亂之道也朕已屢批付卿外今三省議定

再劄下可行下諸將朕行遣應副邊事雖寢食之間不敢忘卿知

宣諭施行節制事一項

節制事一項付卿施行庶歸於一易於聽從已親筆批去今再劄下可遍行諸將

宣諭再劄下宣節制事

檢會元降指揮宣撫總制置制置護諸將仰諸路統制軍兵官遵依元降指揮並聽宣撫節制如取宣撫節制

不及者令聽制置節制其張灝种師弓王以寧旣統領

兵馬自合依諸路例施行

急速行下

此係急速卿可火急遍行下諸將慮到太原平川節制不一不便切早行下此大事也行訖奏來

奏乞起發弓弩手劄子

臣契勘范世雄今日以統領到土兵等見依則例犒設及支散器甲節次起發赴解潛軍前據折彥質劄子稱解潛委是危急等候前來策應臣已曾奏聞乞降睿旨

將守禦使司勾去刀弩手及撥付種師道下湖南將兵
依舊起發赴本司差往河東策應伏望聖慈體念解潛
一軍緣金人重兵前來委實頭重或有疎虞遂致猖獗
則威勝澤潞一帶便見搔動特賜允從差人管押令蹉
程前來不勝幸甚取進止

御筆

四日已發去朕行遣邊事不使少有遲滯不曾少放
心日逐憂念

乞致仕宮觀劄子

臣輒瀝誠懇仰干天聽載惟冒瀆良積兢惶伏念臣學識迂疎才術短淺幸遭陛下龍飛之初誤蒙識擢獲參大政方金人犯順危城之中特被委任晝夜罄竭不敢辭難常以叨冒過當欲俟敵退事平之後乞歸田里章疏屢上不蒙俞允佩戴恩德以感以慚比者奉命宣府兩路眷倚之重尤非愚臣所能克堪力辭不獲黽勉就職冀圖報效以副陛下北顧焦勞之憂而臣素不諳練

兵家之事號令不明方略無取自出師以來將士屢北
未能有尺寸之功仰荅殊遇夙夜憂悸不遑寧處舊有
心氣之疾怔忡健忘頓不能枝若不投誠控告君父誰
復為臣言者軍政廢弛且誤國事雖伏斧鉞之誅亦復
何補伏望聖慈矜憐特降睿旨擇所以代臣者罷臣職
任許令迺邇前去聽候指揮如蒙天恩終始保全未加
竄責令臣守本官致仕或外任宮觀一次退休養疾豈
勝感戴激切之至取進止

梁谿集卷五十三